

DOMENIE XVIII «VIE PAL AN»

Jutoris pe Liturgjie

Domenie, ai 4 di Avost dal 2019

Come titul par une riflession sul vanzeli di vuê, o podaressin meti lis peraulis di Gjesù: Cussì i capite a di chel ch'al ingrume ricjecis par se e nol devente siôr denant di Diu.

Duncje nol è che te messe di vuê e vegni tratade la realtât biele o brute de ricjece; vuê Gjesù al vise dome che al è fûr di plomp chel che al ingrume par se e al bute di bande Diu.

Chel al ingrume par se al vûl dî che une tâl persone, dute cjapade di se stesse, no vîf plui ni tune relazion di condivizion cul prossim ni tune relazion cu la peraule dal Signôr. E zire torator di sé e dai siei progjets e si ilût che la vite e dipendi di ce che al è e al à, cuant che invezit ducj si sa: al baste un stupit imprevist par capî che la tô vite no dipent de robe che tu âs ingrumade.

A disin che in zornade di vuê un frutin di trê-cuatri agns al à za trê impegn setimanâi al di fûr dal orari de Scuele materne, par esempi palestre, pissine, inglês... A dî il vêr, la vite di ducj, se no si sta atents, si ridûs a une corse par sintîsi e mostrâsi in cualchi maniere "cualchidun". O stin diventant ancje nô furlans chel om siôr che al jere dut cjapât dai terens, dal racolt, dai depuesits, dal forment, de robe... de cariere, dai apuntaments, de imagjine, dal timp libar, dai viaçs, dai sports... smentean il tribulât che tu âs dongje, il stâ tal profont di te stes, une sane culture e il librut dl vanzeli cu la vite dal Signôr.

Vivi te superficialitât des modis di vuê al vûl dî pierdi timp par adorâ chei idui che ognun, bombardât di trombetis e tambûrs, si costruîs.

Se chest al è vêr, e vâl ancje par nô Furlans / Furlanis la conclusion de parabule di vuê: Om cence sintiment! - om / femine o sês propit cence sintiment!

Antifone di jentrade

Sal 69,2.6

Salvimi, Diu,

spessee a difindimi.

Tu sês tu il gno ripâr e la mê difese;

Signôr, no sta intardâti!

Colete

Vuarde, Signôr, i tiei fameis

e da la tô eterne protezion a di chei che te domandin;

a di chei che si tegnin in bon di vêti par lôr creadôr e paron

rinove lis robis che ti plasin e ten cont di ce che tu âs rinovât.

Pal nestri Signôr Gjesù Crist to Fi, ch'al è Diu

e cun te al vîf e al regne dutune cul Spirtu Sant,

par ducj i secui dai secui.

PRIME LETURE

Qo 1,2; 2,21-23

Ce i restial mo al om in dute la sô fadie?

Qoelet al è un mestri che al vîf a Gjerusalem tal tierç secul p.d.C. In chei agns par une conzunture economiche fortunade a Gjerusalem si beçolave e la tentazion di butâsi sui bêçs e jere al ordin dal dî par tancj di lôr.

Lavorâ di un lusôr a chel altri par ingrumâ e ingrumâ par sodisfâ capricis.

O vin di domandâsi: puedie sedi vuê une tâl mentalitât tune part de int dal Friûl?

Qoelet, om navigât e espert de vite, al fâs lis sôs considerazions.

Vevial reson? Cemût lis valutîno?

Dal libri di Qoelet

Nuie di nuie, al à dit Qoelet, nuie di nuie: dut al è nuie.

Parcè che and è un om ch'al à fadiât cun sapience, cun sience e cun impegn e al à di lassâ ce ch'al è so a di un altri che nol à fadiât un colp. Ancje chest al è un nuie e une disgracie grande. Di fat ce i restial mo al om in dute la sô fadie e tal afan dal so cûr, che si è lambicât sot dal soreli?

Par ducj i dîs de sô vite, il so lavôr al è dolôr e aviliment. Il so cûr nol padine nancje di gnot. Ancje chest al è un nuie.

Peraule di Diu.

SALM RESPONSORIÂL dal Salm 94

Il beçolâ al pues puartâ a no vê dibisugne di nissun, nancje dal Signôr, e la societât di vuê e somee che e rivi a lâ indevant cence preâ e cence meti pît in glesie. A talpinin però simpri di plui a cirî soluzions extra che no rivin a cjatâ. Come che al dîs il Signôr midiant dal profete:

Propit dôs incuitâts al à cumbinadis il gno popul: / mi à bandonât me, / risultive di aghe vive, / par sgjavâsi poçs / poçs scrodeâts che no tegnin aghe (Gjer 2, 13).

Noaltris restìn cul Signôr; disìn cun dut il cûr la invocazion dal salm responsoriâl:

R. Fâs che o scoltin la tô vôs, Signôr.

Se cjantât: Il cjant dai salms responsoriâi, p. 244.

Vignît, batin lis mans al Signôr,
fasin fieste a la crete che nus pare;
presentinsi denant di lui ringraziantlu,
fasin fieste cun cjantis di ligrie. **R.**

Vignît, butinsi a schene plete
denant dal Signôr che nus à creâts,
parcè che al è lui il nestri Diu,
e nô, il popul che lui al passone,
il trop de sô malghe. **R.**

Joi, se vuê la sô vôs o scoltassis:
«No stait a inrochîsi tal vuestri cûr come a Meribe,
come tal desert te di di Masse,
là che mi an tirât a ciment i vuestris paris,
a an volût provâmi,
ancje se a vevin viodudis lis mês voris». **R.**

SECONDE LETURE

Col 3,1-5.9-11

Cirî lis robis di lassù là ch'al è Crist.

Domandant scuse, o lassin di bande la sostance di cheste leture, par fermâsi tal clime de messe di vuê a lis peraulis: chê gole di vê simpri di plui che e je rude idolatrie.

Adorâ un idul al vûl dî butâ di bande il Creadôr dal univers intîr par inzenoglâsi sicut sclâfs denant dai bêçs e des grandecis dal mont.

Il Signôr al dîs: No tu âs di butâti denant di chescj dius e il salmist al spiegher clâr: I lôr dius invezit a son arint e aur, / vore des mans dai umign. / A àn bocje ma no fevelin, / a àn vôi ma no viodin. / A àn orelis ma no sintin, / a àn narilis ma no nulin. / A àn mans ma no palpin, / a àn pîts ma no cjaminin, / nol salte fûr un fil di vôs de lôr bocje (Es 20, 58; Sal 115, 4-7).

Par cui che al à orelis par capî, al è dit dut.

De letare di san Pauli apuestul ai Colossês

Fradis, se o sês resurîts cun Crist, cirî lis robis di lassù là ch'al è Crist, sentât a la gjestre di Diu; pensait a lis robis di lassù e no a chês de tiere: di fat o sês muarts e la vuestre vite e je platade cun

Crist in Diu. Cuant che il Crist, nestre vite, al comparissarà, alore ancje vualtris o comparissarês cun lui riviestûts di glorie.

Fasê duncje murî lis parts ch'a son de tiere: fornicazion, sporcjetât, passion, golis disordenadis e chê gole di vê simpri di plui che e je rude idolatrie.

No stait a dâsi bausiis un cul altri, parcè che si sês disviestûts dal om vieri e dal so mût di operâ e si sês riviestûts dal gnûf, che si rinove, par une cognossince plui plene, sul stamp di chel che lu à creât. In cheste condizion no je plui cuistion di grêc e di gjudeo, di circuncidût e di incircuncidût, di barbar, di scite, di sclâf, di libar, ma di Crist, dut e in ducj.

Peraule di Diu.

CJANT AL VANZELI

Mc 1,15

R. Aleluia, aleluia.

Il ream di Diu al è rivât:

convertîsi e crodêt tal vanzeli.

R. Aleluia.

VANZELI

Lc 12,13-21

A di cui larano lis ricjecis che tu âs ingrumadis?

Scoltant chest vanzeli, cualchidun, cence nacuarzisi, al sbrissarà te considerazion des ricjecis dal sisteme glesiastic che tai secui plui di une volte al à dit: o butarai jù i miei depuesits e int fasarai sù di plui grancj.

Al scriveve Karl Barth ancjemò tal an 1911: "Al è impussibil no restâ maraveâts se o considerin che il cristianisim di ogni confession e tendence al vebi tai secui cjapât par scherz lis peraulis di Gjesù: No stait a ingrumâ tesours su la tiere - No podeis servî a Diu e a mamone, al beçolâ e a lis ricjecis (Mt 6, 19; 6, 24) intant che al frontave spes cun passion, cun grande premure, rigôr e precision cuestions di dogmas che no àn vût nissun significât pe vite di Gjesù".

A puedin valê par nô, ma a valin ancje pal sisteme glesiastic lis peraulis dal vanzeli: Om, sisteme, o sês cence sintiment!

I sants, i puars, i dissepui dal Signôr a son secui che a spietin un cambiament, une conversion dal ordin clericâl in proposit.

Dal vanzeli seont Luche

In chê volte, un de fole i disè a Gjesù: «Mestri, dâsii a gno fradi di spartî cun me la ereditât». Ma lui i rispuindè: «Amî, cui mi aial metût come judiç o mediatôr su la vuestre robe?». E ur disè: «Viodêt di tignîsi lontans di ogni sorte di avarizie, parcè che ancje se un al è une vore siôr, la sô vite no dipent de sô robe».

Po ur contà une parabule: «Al jere un om siôr ch'al veve terens e chescj i vevin dât un bon racolt. Lui al resonave dentri di se cussi: Cumò no ai plui dulà meti il gno racolt; cemût aio di cumbinâ? E al disè: O cumbinarai cussi: o butarai jù i miei depuesits e int fasarai sù di plui grancj, in mût di podê ingrumâ li dentri dut il gno forment e la mê robe. Po mi disarai: Bon! Cumò tu âs metude vie une buine scorte par un grumon di agns. Polse, anime mê; mangje, bêf e gjolt. Ma Diu i disè: Om cence sintiment! Juste usgnot ti tocjarà di murî e a di cui larano lis ricjecis che tu âs ingrumadis? Cussi i capite a di chel ch'al ingrume ricjecis par se e nol devente siôr denant di Diu».

Peraule dal Signôr.

Su lis ufiertis

Santifiche, Signôr te tô bontât, chescj regâi e, daspò di vê acetade l'ufierte de vitime spirituâl, fâsinus diventâ ancje nô une ufierte eterne.

Par Crist nestri Signôr.

Antifone a la comunion

Sap 16,20

Tu nus âs preparât, Signôr, un pan dal cîl,
un pan in grât di dânus ogni contentece
e di sodisfâ ogni gust.

Daspò de comunion

Compagne cu la tô continue protezion, Signôr,
chei che tu âs ristorât cul regâl dal cîl
e fâs diventâ degns de redenzion eterne
chei che no tu ti stufis mai di vuardâju.
Par Crist nestri Signôr.

* * *

Cjants

Libri *Hosanna*, sot il titul **Eucaristie**: messe, benedizion eucaristiche, rîts e cjants; dal n.7 al n.62
comprendût.

* * *

Usciva il 15 gennaio 1949 il primo numero del giornale "Adesso" riecheggiante tutta la tematica di don Primo Mazzolari dell'impegno teso a dare dignità di vita ai poveri e a tradurre il messaggio evangelico negli ordinamenti politici. Non mancavano accenni critici a certi comportamenti e gesti cattolici. A proposito dell'offerta da parte del cardinale di Milano del suo anello pastorale per costruire case ai senzatetto, in un trafiletto si auspicava che a tale scopo fossero destinati, nella penuria di alloggi per le distruzioni belliche "anche gli ori e gli argenti dei santuari di Caravaggio, di Loreto, di Pompei, di tutte le basiliche e chiese d'Italia".

A proposit dal don dal anel don Mazzolari i scriveve al vescul te letare dal 29. 01. 49:
"Se il gesto del cardinale di Milano non ha il significato che ho letto nel volto degli umili, ha ragione il giornale L'Unità che lo ha paragonato al dono di quelle signore che hanno dato l'anello alla Patria perché ne avevano uno più bello da infilare immediatamente.

Eccellenza, per poter riprendere fiducia in noi il popolo ha bisogno di vederci distaccati fino all'eroismo".

Des letaris di don Primo Mazzolari

* * *

* *I salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrîvêt a info@glesiefurlane.org*